

0+

“Торо пиалан улыт яндар шўман-влак:
цуло Юмын уажыт” (Мф. 5:8).

ШҮМ-ЧОН ЦЗОЛЫК

2013 ий март
годсек лектеш.

МАРИЙ ПРАВΟΣЛАВНЫЙ ЖУРНАЛ 11-ПЕК (79) №, 2019 ИЙ СНОЯБЬ

Йошкар-Оласе да Марий Элысе Высокопреосвященнейший митрополит Иоаннын благословитлымыже почеш

ПРЕПОДОБНЫЙ СЕРГИЙ РАДОНЕЖСКИЙ




**9 ОКТЯБРЬШТЕ
ПРАВΟΣЛАВИЙ ИСТОРИЙЫН
ТОШТЕРЫШТЫЖЕ
«ПРЕПОДОБНЫЙ СЕРГИЙ РАДОНЕЖСКИЙ»
ВЫСТАВКЕ ПОЧЫЛТЫН.**

Русьын Юмылан йöрышö кугу святойжо нерген выставкым ямдылаш кўлмö нерген шонымаш эше 2018 ийыштак шочын. Йошкар-Оласе да Марий Элысе епархийын, Православий историйын тоштержын да Марий Элысе Т. Евсеев лүмеш национальный тоштерын археологий пöлкажын ылышыш пырля шындарыме проектшт öрыктарыше лектышым пуэн. Кугун пагалыме святойын, преподобный Сергей Радонежскийын, ылышыж нерген тыште шуко уым пален налаш лиеш. Выставкым торжественно почмо годым саламлымаш мутым Йошкар-Олан да Марий Элын митрополитше Иоанн ден Марий Эл Республикысе тўвыра, печать да калык-влакын пашашт шотышто министрын алмаштышыже А.Н. Луничкин ойленит. Йошкар-Оласе Сергей Радонежский лүмеш гимназийын йоча хоржо икмыняр ныжыл мурым мурен. Ты гимназийыштак тунемше Ольга Шевчук «Чудотворец» почеламутым сылнын лудын. Выставке почмашке толшо уна-влаклан тиде чылажат кугу пöлек шотеш лийын. Тыгай чапле выставкым ышташ полшымылан тоштер пашаен-влак Йошкар-Оласе да Марий Элысе епархийлан, поснак владыка Иоаннлан кугу кумылын тауштеныт.

Тўн ужаш деч вара тоштерын кугурак шанче пашаенже Д.Е. Калмыков-Бережницкий экскурсийым эртарен, выставкыш чумырымо материал-влак дене кумданрак палдарен. Ончыкыжым «Преподобный Сергей Радонежский» выставке Российысе монашествын историйже ден исторический каллиграфийым тунемме шотышто программе-влакым эртараш келыштаралтеш.

Кумылан-влак поян да чапле выставкым ончаш
18 ноябрь марте толын кертыт.



ЧЕРКЫМ СӖРАСТАРАШ ГОСПОДЬ ЙӖНЫМ ПУА

Преподобный Силуан Афонскийым шарныме кечын, 24 сентябрьште, Юмын Аван Шочмыжо лӱмеш Марий Турек районсо Хлебниково селасе храмыште архиерейский служений лийын. Волжск ден Шернурын преосвященнейший епископшо Феофан кугун орланыше святой Георгий Победоносец лӱмеш приделысе престолым Кугун освятитлыме чиным эртарен, вара Юмын литургийым вӱден. Владыка дене пырля Косоолоп селасе Никольский храмын настоятельже протоиерей Александр Милютин, Мамсинер селасе Свято-Троицкий храмын настоятельже протоиерей Лев Федотов, преподобномученик Андрей Критский лӱмеш У Торъял район Елембаево селасе храмын настоятельже протоиерей Сергей Бажанов, Мариец посёлкысо Никольский храмын настоятельже иерей Николай Аникин да Волжск оласе Никольский соборын клирикше диакон Иоанн Захаров служитленит.

Владыка шке проповедьшым тыге тӱналын: «Юмын Аван да святой-влакын молитвашт полшымо дене Господь мыланна тиде храмым сӖрастараш йӖным пуа. Кажне ойгырышо чон храмыште лыпланымашым муэш. Евангелийште Господь Шке тунемшыж-влаклан каласен: «Мый денем ушнен шогымаште теңдан тыныслыкда лийже манын, тыланда тидым ойленам. Тӱняште те орланаш тӱналыда, но лӱддымӧ лийза: Мый тӱням сененам» (Ин. 16, 23–33). Шуко орлыкым чытыме гоч гына ме Пылпомыш Кугыжанышыш пурен кертына. Но кеч-могай ойгыжат мыланна чоннам утарышаш верч пуалтеш манын умылыман да чылажымат

ЙӖНЫМ ПУА

Господьым йӖратымаш дене нумалман, вет тидын гоч мыланна сулыкна касаралтмаш пуалтеш. Илыш корнынам яндарын да поро койыш-шоктыш дене эртышаш верч Господь мемнам тыге пенгыдемда, йӖсым сенаш тунукта. Курымашлык илышыш яндар чон дене пурен, Святой Шӱлышын пуымо каласен моштыдымо йывыртымаш дене тушто Юмылан служитлаш да Тудын дене ушнаш лийже.

Таче ме преподобный Силуан Афонскийым пагален шарнена. Тудын да моло святой-влакын примерышт гыч шуко сайым палаш лиеш. Юмын лӱмжым чарныде ўжын, Христос верч тыршен, ме, Юмо деч языкым касарен, куштылгылыкым налын кертына да мландымбалысе илышыштак куаным шижаш тӱналына. Шӱм-чон тыныслыкым да мыланна сӖрымӧ Пылпомыш Кугыжанышын куанжым ме храмыште веле огыл, чыла вереат шижын кертына. Тидлан кажне кечын чыла пашанам ме Юмо лӱмеш ыштышаш улына. Кажне мутна, чыла шонымашна да пашана Юмылан йӖрышӧ лийышт. Тыге илыше айдеме Юмылан йӖрышӧ Силуан Афонскийын ӧрыктарыше шижмашышкыже шуын кертеш. Храмыш толшо кажне прихожанин тыгак шке лишылжым але тудлан осалым ыштыше айдемым чынжымак уло чон дене проститлен кертеш гын, тунам шке кӧргыштыжӧ кугу куаным шижеш».

Преподобный Силуан Афонскийын илышыж гыч владыка Феофан эше шуко пайдале примерым конден да престолым освятитлыме дене чылаштым саламлен, сай тазалыкым да чонышто тынысын шукеммыжым тыланен.

ШКЕ ЫРЭСНАМ НУМАЛАШ ВИЙНА СИТЫЖЕ



Шернур районысо Кукнур селәсе черкым Господьын Кугун пагалыме да Илышым пуышо Ыресшым Нөлталме лүмеш святитлыме. Сандене тиде пайрем лүмеш кажне ийын 27 сентябрьште тыште кугу службо лиеш. Юмын литургийым вұдаш Волжск ден Шернурын епископшо Феофан толын. Владыка дене пырля Йүдвел черке округын благочинныйже протоиерей Владимир Власов, Юмын Аван Леvedмыж лүмеш Марисола черкын настоятельже протоиерей Сергей Сильдушкин да Волжск оләсе Никольский соборын клирикше диакон Иоанн Захаров служитленыт.



Юмын литургий деч вара духовенство ден прихожан-влак храм йыр крестный ход дене эртеныт. Владыка Феофан чылаштым престольный пайрем дене саламлен да ты пайремын историйже дене палдарен. Вара тыге туныктен ойлен: «Господь дене ушнымаште йоратыме ача, иза-шольо да ака-шўжар-влак! Юмын порылыкшо дене ме таче Тудым мокташ тиде сылне храмыш

погыненна. Тўн престолын пайремже лүмеш ме, чот йывыртен, Господьын Кугун пагалыме да Илышым пуышо Ыресшылан вуйнам савена да Христос Шочмо деч вара 326 ийыште лийше историйым веле огыл, ме тыгак Утарышын Ыресеш орланен колымыжым, курымашлык колымаш деч утарышаш верч мемнан сулыкнам Шке Умбакыже налмым шарнен, мемнан чоныштына тыныс ден ласкалыкым пенгыдемдаш йодына.

Кажне енын ылышыштыже шке ыресше уло. Тиде ыресым чытенак нумалаш Юмо мыланна вийым пуыжо. Ме тиде ыресым Господьлан таум ыштен, чоныштына Юмо да лишыл енна дека йоратымашым арален да шке сулыкна верч окынен нумалшаш улына. Кертме семын Юмын храмыш толашак тыршыман. Сулыкнам почын каласен, Христосын Святой Капше ден Вўржым кўргышкына налме дене ме Юмын польшлан йорышў лийына. Юмын польш деч посна нимогай духовный ылыш лийын ок керт. Тачысе престольный пайрем кечын тыланда, иза-шольо ден ака-шўжар-влак, чоныштыда Юмын пуымо тыныслык лиймым да Господьын лишне улмыжым палдарыше волгыдо куаным тыланем. Пылпомыш Кугыжанышыш тўрлө чарак деч посна шуаш манын, ылыш корныштына чыла тиде пеленна лийже. Жаплан пуымо тиде ылышыштына Пылпомыш Кугыжанышын волгыдыжым шижаш лийже. Пылпомышысо Ачана да Господь Иисус Христос деч тыланда порылык да тыныслык лийже!»

Тиде кечынак епископ Феофан Шернур районысо Казанский селаште верланыше школ-интернатыш миен. Владыка тушто тунемше черлырак йоча-влакым пайрем дене саламлен, ты пайремын историйже нерген каласкален да шке архиерей суапландарымашыж дене кажныжым благословитлен.

**Пресс-службын материалже почеш
А.ЧЕМЕКОВА ямдылен.**



ЙОЧА ЙЎК ДЕНЕ СУРТ-ПЕЧЕ ЙОНГАЛТШЕ

Тачысе саманыште ен-влакын шўм-чоныштым туржшо ик эн кугу ойго – тиде йоча шочдымаш. Кызыт тўняште кажне визымше мужыр йочам ыштен ок керт. Статистике ойла: ўдырамаш-влак 40 процент, пўрѐншамыч 45 процент случайыште титакан улыт, а кодшо 15 процентшым мужырын келшен толдымыштлан ойырыман. Йоча шочдымаш – тиде посна чер огыл. Тудо тўрлў фактор деч шога. Медицине нуным сайын шымлен, йочам ыштен кертдымым эмлыше ятыр программым ямдылен. Нунын почеш мужыр-влакым эмлен, пиалан ача-ава лияш полша.

Йоча шочдымаште физический амал деч посна эше духовный экшык-влак улыт. Тидын нерген медицинин профессоржо, «Санкт-Петербургысо православный врач-влак» обществын председателъже, протоиерей Сергей Филимонов статьялаштыже шуко возен, йочадыме мужырлан нуным лудын, шымлен лекташ гын, пеш пайдале лиеш. Афонысо старец Паисий Святогорец «Молап южо ўдырамаш йочам ыштен огеш керт?» йодышлан тыге вашештен: «Тыгай ўдырамаш-влак кокла гыч южышт марлан каяш кўлмў годым марлан лектын огытыл, сандене кызыт нуным духовный закон «туныкта». Кычалтылше койышан ўдыр-влак качым ойыркалат: «Тиде рывезе мылам огеш келше, тудо мотор огыл». Ик гана Юмын колтымо пиалым шўкалмек, поро илышыш от шу. А южо ўдырамашыже самырыкше годым языкан илышым илен. Улыт тугай ўдырамаш-влак, кудышт шотдымын кочкыт, сандене йочам ыштен огыт керт. Вет кызыт шуко кочкышышто химикат ден гормон-влак улыт».

Тиде ойго нерген Морко район Арын селасе Иисус Христос лўмеш черкын настоятельже протоиерей Николай Чузаев дене кутыралтышна.

– Николай ача, ешыште йоча укелык пытартыш ийлаште поснак чўчкыдын вашлиялтеш. Палыме-влак коклаштат, родо-тукым коклаштат тиде ойго кумылым волта, южо самырык мужырым ойырлымашке шукта. Мужыранмаш – тиде святой кыл. Вате ден марийын икшывышт уке гын, тиде ешлан шаланаш амал лийшаш огыл. Тудым шалатымаш Юмо ваштареш кайыме дене иктак лиеш вет?

– Йўратымашым тўрысnek ик енлан веле пўлеклаш лиеш. Нравственный законат, Юмын кўштымашат тидым йодыт, уке гын йўратымаш намыс пашаш савырна. Мужыр лийын ушнаш Юмо полшен гын, вате-марийлан ойырлаш нимогай амал лийшаш огыл. Вет тиде мыланна пуалтше, утаралтмашыш нангайыше ырес. Икте-весым чытымына дене курымашлык куан илышыш пурен кертына. Но меже чыла тамлыжым тачак налнена. Кызыт СМИ, Интернет илыш деч тачак чыла налаш кўлеш манын темлат. А Святой Возымаш ойла: «Кишке гай ушан лийза» (Мф.10:16). Тиде ондалчык саманын койышыжым шижын мошташ кўлеш, уке гын вожылмашеш кодына. Ешымат жапыштыже погыман, кычалтылман огыл, йочамат Юмо кунар пуа, тунар ыштыман. Юмо деч лўдмаш, Тудын законжым шуктымаш пиалым тичмашын пуэн сена.

– **Айста илыш гыч примерым ончалына. Самырык вате-марий коктынат кўшыл шинчымашан улыт, сўаным ыштен илаш тўнгалыныт, но кум-ныл ий эрта, а йоча огеш шоч. Молап?**

– Нине самырык ен-влак, очыни, сўан деч ончычак вате-марий семын иленыт. Таче модышто улшо гражданский бракыште шукын тыге яжарланен илат. Еш илышым Юмо деч посна тўналмашын лектышыже уке. Юмын кажне шомакше – тиде творческий акт. Мом Тудо ойла – чылажат шукталтеш. Кўшыл

шинчымашан, кугу интеллектан айдемылан шке илышышкыже Юмын пурташ куштылго огыл. Но ме палена: илыш ўнгышемда да чыла шке верышкыже шында. Моторлыкат эрта, шуко палымынат кўлдымашыш лектеш, илышнажат шошо вўдла йоген кая. Тидым умылен, илышнам тўням Пўрышын, чыла кучен Ашнышын кўштымыж почеш нангаяш вашкышаш улына. Мом йодмына тыге веле пуалтеш. Мемнан ўмбалне улшо уда койшыш-влак: шкалан гына тыршымаш (эгоизм), ўскыртлык, чоштыра шўман улмаш – Юмын порылыкшо деч корандат. Тыге ынже лий манын, мыланна пушкыдо кумылан, ўшаныше лияш кўлеш.

– **Южо самырык мужыр шоненак йочам огеш ыште. Эн ончыч вузым тунем пытараш кўлеш, йолымбак шогалман, пачерым, машинам налман, а вара йочанат лияш лиеш, маныт. Но вара тыгай вате-марийлан Юмо ала-молан йочам колташ огеш вашке.**

– Тынеш пурышо-влак илыш корныштым ончылгоч радамлат гынат, мучашыште каласышаш улыт: мемнан шонымо семын огыл, а Юмылан кузе кўлеш, туге лийже. Тыге тўналме кеч-могай паша Юмын ончылно сай. Афонин кумдан палыме старецше эше тыге ойла: «Тулык йочам ончаш налышт манын, южгунам Юмо вате-марийлан йочам огеш пу». Йочапўртлаште шуко икшыве ача-ава деч посна кушкеш. Титакышт уке гынат, нуным ойган илыш вуча. Йочадыме еш нунылан куаным, пиалан ончыкылыкым пуэн кертеш.

– **Коча-кова лийшашлык-влакат ўрмалгат, вет нуно уныкам вучат. Кузе нуно икшывыштлан полшен кертят?**

– Коча-кова лийшашлык-влаклан эн ончыч шке языкыштым касараш вашкыман. Илыш корныштым Юмо деке савырышаш улыт. Нунын да уло тукымын языкыштлан кўра самырык-влак орланат. Арам огыл калыкмут ойла: «Олма олмапу деч торащ ок камвоч». Южо тукым ўмбалне каргымаш уло: кў черкым шалатен, юмонам руэн, йўлалтен, Юмылан ўшаныше-влакым шыгыремден. Тыге ыштыше-влак ынде колен пытенят гынат, сулыкыштым самырык тукым языкым касарыме годым ойлен, Юмо деч

чаманымашым сўрвалышаш.

– **Мужыранмашым ожно черкыште венчаялтмаш дене пенгыдемденят. Санденак, очыни, йоча-влак шуко шочыныт, ешат шаланен огыл. Арам огыл черке венчаялташ темла. Венчаялтмашын вийже пеш кугу.**

– Венчаялтмаш – тиде Святой Черкын таинствыже. Тыгодым мужыр Юмын благословенийжым налеш. Венчайыме годым священник мужырлан йочан лияш, таза лияш, илаш чыла ситышым колтыжо манын, Юмылан кумалеш. Венчаялтме годым тыге сўрвален йодмашым Юмо шуктыде огеш кодо. Мыланнаже веле духовный илыш дене илыман, Юмылан ўшанна пенгыде лийшаш.

– **Чыла тиде йодышым радамлен лекмек, могай иктешлымашым ыштыман? Мутланымына ача-ава ден коча-ковалан пиалан лияшышт полша манын, ўшаныме шуэш. Тидым нунылан алал кумыл дене тыланена.**

– Святейший Патриарх Кирилл элнан йўдвел монастырьыштыже лиймыж годым тыге ойлен: «Юмын Шомакше палдара, эртыме илышын опытшо ончыкта: ешыштына пиал лийже, шўмыштына тыныслык лийже манын шонена гын, самырык тукымнам арален кодынена гын, шке элнам вияным ужнена гын, ончыкылыкна лийже манын шонена гын, айста илышнан пўртшым ошмаш огыл, а ўшанымашын кў негызешыже чонена! Отшельник-влак мланде тўрысў йўштў кундемыште илен лектыныт веле огыл, а шке йырышт тўжем дене еным погенят да тиде ир верым пеледалтше илемыш савыренят. Тыгай подвигышт – мыланна пример. Кў шке илышыжым ўшанымашын кўжў ўмбален негызла, тудын йырже йоча, уныка, уныкан уныкаже, пошкудо ден йолташ-влак погынат. Тыгай енын чын да курымашлык корно дене кайымыжым ужын, шкештат тиде корным ойырен налаш кумыланят. Ўшан дене илыше, Юмын мутшым шукташ тыршыше ен ўрдыжеш кодымо ок лий. Шке жапыштыже тудын ўмбалне Юмын мучашдыме порылыкшо, кугу чаманымашыже почылтеш».

А.ТАНЫГИНА мутланен.



МЕ АЛЕ МАРТЕ ЮМЫН ТЫГАЙ КУЛЖЫМ УЖЫН ОГЫНАЛ



Святитель Нектарий Эгинскийын тынеш пуримо лүмжө Анастасий лийын. Тудо 1846 ий 1 октябрьыште Константинополь деч тораште огыл верланыше Фракийысе Селибри селаште шочын. Димос ден Василика Кефаласмытын ешыште тудо визымше йоча лийын. Ача ден аважын ласкалыкышт чылаштлан ситен. Нуно чыла шочшыштым изинекак духовный книга да молитвам лудаш, черке мурым мураш туныктеныт. Анастасий чүчкыдын храмыш коштын, тушто колыштмо проповедьым кужун шарнаш манын, мөнгыштö тетрадьыш возен. Тыгак святой-влакын илышышт нерген лудаш йöратен. Тўналтыш школым тунем пытарымеке, умбакыже тунемаш каяш йөн лийын огыл, сандене икмыняр жап шке селаштыже илен. 14 ияш улмыж годым ик капитан тудым Константинополь олаш пырля налын. Рвезе тушто тамак ужалыме кевытыш пашаш пурен, но пашадар кочкыш налашат ситен огыл. Вургем ден йолчиемже чот тоштеммеке, Анастасий, полишым йодын, Господь Иисус Христослан Пылпомышыш серышым возен. Ик торговой ең серышыжым почын лудын да рвезылан оксам колтен.


Икмыняр жап гыч Анастасийым Господьын шўгарже лўмеш Храмын подворьешкыже налыныт да школышто пашам пуэныт. Тыште шкежат тунемын, шинчымашыжым нöлтен кертын. Мастарлыкшым ужын, тудым Хиос отрошто верланыше Лифи селашке туныкташ колтеныт. Тудо тыгак ең-влаклан шке кумылын Евангелийым умылтарен, хорым чумырен да верысе храмыште мурыктен.

Юмын эрыкше дене Анастасий 1875 ийыште Нео Мони обительыш каен. Испытанийым эртымеке, инок лияш ўп пўчмö йўлам эртен, Лазарь лўмым налын. Кок ий гыч Нектарий лўм дене монах лийын, да тудлан иеродиакон саным пуэныт. Александрийысе Патриархын суапландарымыж почеш Афинысе университетын богословский факультетышкыже тунемаш пурен.

Университетым 1885 ийыште пеш сайын тунем пытарымеке, илаш да пашам ышташ Александрий олаш каен. Святой Савва лўмеш обительыште ончыч священник, а икмыняр жап гыч архимандрит лийын. Кум ий эртымеке, тудым Пентапольын епископшылан шогалтеныт, но тушто тудлан пеш кöранаш тўналыныт да ваштареш шогалыныт. Сандене ик ий гыч тудлан тушеч коранаш логалын. Святитель Египет гыч Афиныш пöртылын, но грек гражданствыже лийын огылат, тыштат тудым шыгыремдаш тöченыт. Владыка сай проповедник лийын, сандене калык тудын пашажым чот аклаш тўналын. Тиде пагалымашым нимогай шоя денат сенен кертын огытыл да святитель Нектарийлан Афинысе богословский школым вуйлаташ ўшаненыт.

1904 ийыште Владыка Эгиныш толын да порт деч тораште огыл, Ксантосышто, шаланыше монастырьын негызшым муын. Ожно тушто Эгинысе святой Анастасий кумал илен. Владыка Нектарий тиде мландым тўлен налын да шаланыше черке ден Эн святой Троице лўмеш обительым 1914 ий марте сайын тöрлатен да уэмден шуктен. Афинысе богословский школыштат эше 1908 ий марте тыршен, вара йöршынлан Эгинысе ўдырамаш монастырьыш куснен. Тыште тудо послушнице ден инокине-влаклан догматике, аскетике да этике дене шинчымашым пуэн, нунын чыла йодышыштан вашештен, лыпландарен, духовно пенгыдемден.

Пытартыш жапыште святитель Нектарий тўрлö чер дене орланен. Эмлымверыште тудо йорло-влак дене пырля ик палатыште эмлалтын. Чыла нелылык годым Юмылан



таум ыштен да 1920 ий 8 ноябрьыште мландымбалысе илышыжым мучашлен.

Грек калык тудым кызыт мартеат кугу чудотворецлан шотла. «Святой Нектарийын паремден кертдыме чер уке» манит тушто. Колымекыже, ег-влаклан кузе полшымыж нерген ик öрыктарыше историйым шарналтена. Эгине кырыкан верысе ик ялысе черке 2001 ийыште священник деч посна кодын. Святой Кугу пүтö деч ончыч ег-влак тургыжланаш тўналыныт, вет икымше да пытартыш арнян уло Греций чот кумалеш, ны пашам огыт ыште, ны огыт тунем. Ыресеш пудалыме Христос лўмеш траур лиеш, чыла флагым волтат. Ег-влак кажне службыш да крестный ходыш кошташ тыршат, пенгыде пўтым кучат, южышт йöршынат огыт коч.

Ты ялысе кресаньык-шамыч архиерейлан тыгай серышым возеныт: «Святой Владыка, кеч Страстной арнялан мыланна священникым колтыза. Тунам меат уло калык семынак шот дене ямдылалтын, сулыкнам касарыктен, Святой Причастийыш ушнен, Кугече пайремым йывыртен вашлийына ыле». Епископ серышым лудын, епархиальный погынымаште йодышым тарватен, но чылаштын шке приходыштышт пашашт шуко лийын. Вес

йодышыш куснымеке, серыш нерген йöршын монденыт.

Теве Христосын Ылыж кынелме пайрем кечыжат толын шуын. Кугече арня эртымеке архиерейлан таум ыштыме серыш толын. «Святой Владыка! Тыланда кўлеш семынак таум ыштен кертшаш мутымат муын она керт. Тыгай поро священникым колтымыланда ме курым мучко тыланда таум ыштен илаш тўналына. Юмын тыгай кулжым ме але марте ужын онал ыле», – возеныт кресаньык-шамыч.

Архиерей öрын йодын: «Священник кокла гыч кө тиде ялыш миен?» Но тушко кошты нигö лийын огыл, сандене епископ саде ялыш кудалын. Калык тудым чиялтыме муно, кулич да пеледыш дене вашлийын. Грецийыште чыла священник госслужащийлан шотлалтеш да, храмыште кеч ик гана служитла гынат, тидын нерген черке журналеш возен кодышаш. Архиепископ вигак алтарыш пурен да кидышкыже журналым налын. Икмыяр страницым шергалын да чернила дене чаткан гына возымым лудын: «Пентапольын Митрополитше Нектарий». Владыкан кидше гыч журнал камвозын, а шкеже тунамак сукалтен возын да кумалаш тўналын.

Тыгай чудо лийме нерген пален налмеке, ег-влак сукалтен кумалыныт, икте-весыштым öндалын, шортыныт, Юмылан да святой Нектарийлан таум ыштеныт. Мо лиймым нуно кызыт гына умыленыт. Чыла Кучышо Господь тыглай ег-влакын сөрвален йодмыштым колын да Пылпомыш Кугыжаныш гыч Шке святойжым колтен. 1920 ийыште колышо святитель Нектарий 2001 ийыште ик арня мландымбалне служитлен, курыкысо күтүчö-влак да нунын ешышт дене пырля Крестный ход дене коштын, гимн ден молитвам мурен, сулыкым касарен, лыпландарен, тунуктен. Ныжыл йўкан тиде шонго геронда Юмо нерген кузе йöратен ойлен, тыгай мутым тысе калык але колын огыл улмаш. Сулыкышт верч уло чон дене öкынен ойлымышт годым шинчавўдышт йорге йogyмын, шўмышт йывыртымаш дене тўргоч теммын амалжым ег-влак иже паленыт. Страстной арня жапыште нунын ны кочмышт, ны омышт шуын огыл, чон эре тиде öрыктарыше шонго священник дене пырля кумалаш ўжын.

Кеч святитель Нектарийын юмонаже шинчаш коймо верыштак кечен, тудо шкежак тыште пырля улмо нерген нигön ушышкыжат пурен огыл, Господь тидым нунын деч шылтен. Святитель Нектарийым, ег-влакын сөрвалымыштым вашке колшо да полшаш вашкыше святойым, 22 ноябрьыште чыла черкыштат пагален шарнат.

А.ЧЕМЕКОВА.

«ЮМО - МЫЙЫН ВОЛГАЛТАРЫШЕМ»



Господь Иисус Христос икымше проповедьыштыжак калыклан индеш у сугыным ойлен. Нунын кокла гыч иктыже тыге йонга: «Яндар шўман-влак поро пиалан улыт: нуно Юмын ужыт» (Мф.5:8). Юмо айдемын чонжым онча, тудо яндар да поро гын, тыгай ен Юмын пален налеш да варажым Туддеч коранмыжат огеш шу. Миром нумалше ўдырамаш-влак Иисус почеш лўдде ўнышын коштыныт, тудат тыгак, нелылыкым, нойымым шижде, Юмо почеш ошкылаш тўналеш.

Мемнан марий ўдырамаш-влак коклаштан тыгай порылык дене вўдылалтше-шамыч шукин улыт. Теве Параньга район Кугу Пумарий селаште верланыше Илия пророк лўмеш черкын старостаже Валентина Аркадьевна Левагинам налеш. Тиде чулым ўдырамашын чытен тыршымыжлан кўра Кугу Пумарий кундемыште Господь Иисус Христосын Волгыдыжо волгалт толеш.

Кугу Пумарий кундемыште тўрлў калык тўрлў Юмылан кумалын ила. Чыным пален налшыже черкыш толешак тырша.

Валентина Аркадьевна тыге палемден кодыш:

– Мемнан кундемысе калык черке илыш дене илаш эше тунем шуын огыл. Кугу пайрем годым Юмын литургийыш толыт, но языкым касараш, Святой Пырчесым подылаш ала вожылыт, ала лўдыт? Южо енже черкышкат

толын коштеш, отышкат каен колта. Сурт-печыштым черке йўла почеш святитлат, но тунамак баптист-влакымат пуртат. Икманаш, койышышыкына двоеверие ден суеверий пижынак шинчын. Теве ўмаште Россий мучко эртыше кугу крестный ход деч вара калыкын кумылжо изиш вашталтме гай чучеш. Екатеринбургыш ырес дене кайыше-влак толмо вашеш Кугу Пумарий ялыш пурымашке Поклонный Ыресым шогалтышна, часамлам чонгышна. А Ырес дене коштшо-влак мемнан черкылан Юмын Аван Федоровский иконыжым пўлеклен кодышт. Тунам калык ончычсо семын тупынь лийын огыл, чылан манме гай уло шўм-чон дене ты крестный ходым вучен, вашлийын да ялым лекмеш ужатен колтен. Ончычшо кузе гына ынде тиде крестный ходым вашлийын-ужатена манын, ўрынам, лўдынам, пеш ойгыренам ыле. Юмылан тау! Вара крестный ходым ужатен колтымо годым чот лишыл родем дене чеверласыме семын кумылем тодылалтын ыле, тунар колтымем шуын огыл, пырля ошкылмем шуын, но мыланем черкым коден каяш огеш лий, вара чот шортынам.

– **Приходьыштыда иктаж вере ырес дене коштыда мо?**

– Ўмаште Индеш кугарня пайрем годым Штрамарий ялыш ырес дене коштынна ыле. Калык шагал огыл ушнен, ме Кугу Пумарий гыч Мариец селаште верланыше черкын настоятельже Николай (Аникин) ача дене Штрамарийыш ошкылна, а тушто мемнам Александр (Милютин) ача вашлие. Тушто службым эртарышна. 6 июнышто, Юмын Аван Мирносицкий иконыжым приходла мучко кондыштарыме пагытыште, Шернур гыч Косолоп селаш кайымына годым, Волжск ден Шернур епископ Феофан селашкына чарнен, у часамланам святитлыш. Тунам шинчавўд йўре куаненна ыле. Тиддеч вара ынде калыкна православий дек мелын лийын, игылтын огыл кошт, ончычынжо мыйым предатель улат манын ойлат ыле (шыргыжеш. – Авт.). Вочарма памашым Юмын Аван Ахтырский юмонаж дене святитлаш миенна. Тунамат калык службым шымлен колышто. Тиде кундемыште шочын-кушшо да ўрдыжтў илен коштшо-влакын кумылышт пушкыдырак, Юмылан ўшанат. Вара пўртылмына годым касеш кодынна. «Господь Иисус Христос мемнам, языкан-влакым, чамане», «Юмын эн святой Аваже, мемнам утаре» манын, мурен толмына годым ваштарешна ошкылшо южо енже, корно тўрыш пурен возын, эртен кайымынам вучен киен. Пычкемыштет лўдыныт ма, ўрыныт ма.

Вочарма памашым святитлыме деч вара мый денем пеш онай паша лийын каен. Пурла пылышемлан машина, имне дене кудалме, ен-влак мутланыме йўк шокташ тўналын. Вара мый, нимолан ўрынамат, мом тиде ончыкта манын, Юмо деч рашемдаш йодын кумалын, кастене малаш возынам. Омым ужам: ты кундемысе вес тўняш

ЛОКТЫЗО-ВЛАКЫН ШӨРГАШТ

Мучаш.

Тўналтышыже – 8-ше номерыште (2019 ий август).

Лач куд шагат кастене омса почылтын, пөлем гыч шем кужу тувыран Клара лектын. Вуешыже шем кужу ўпан парикым чиен. Онгыштыжо кугу медальон кечен. Медальон қоргыштө шўдырым унчыли верандыме. Удырамашын кажне парняштыже – гороскопысо знак-влакым сўретлыман перстенё. Кыдалешыже кытай драконым ушештарыше шөртнялге ўштым кылден. Клара ужын, туддеке толшо-влак шиждымын кысел шогалыныт. Светлана верже гыч тарванен. Мужедше ўдырамаш чылаштым вашкыде шымлен ончалын да кошар парняж дене Светлана ўмбаке ончыктен:

– Почешем ошкыл.

Светлана пеле пычкемыш пөлемыш логалын. Покшелне шогышо йыргешке ўстембалне куд сорта йўлен, но пөлемыш ныл лукешыжат верандыме кужу воштончыш-влаккан көра сорта ятырлан шукула койын. Клара Светлана деч могай йодыш дене толмыжым умылен.

– Вот мо, пагалыме, – пелештен тудо. – Паша томам, но кўштымем чыла радам дене шуктет гын, тылат полшен кертам. Колат, чыла радам дене шуктет гын веле.

Вара мом ыштышашым радамлаш тўналын. Марийже ден тан ватыжын лўмешышт колышым уштымо ўстембалам сортам шогалташ каласыме кыже, Светлана тудым кўрлын:

– Кузе тыге, вет нуно колен огытыл?

– Ит лўд, огыт коло, ойырлат гына. Кызытеш ўстембаке 800 тенгем пыште да кай. Кўлеш-оккўл йодышым пуэден ит шогылт тыште. Кўштымем семын ыштет – угыч мый декаем толат.

Клара дечын Светлана кумыл вошышо лектын, пуйто пеленже пөлемын неле пычкемышыжым налын. «Тетла тышке йолемат ом пыште, черкышкат ом кай», – шонкален ошкылын самырык ўдырамаш.

Но эрлашын мужанчын «Огыт коло, ойырлат гына» манмыжым шарналтен, Светлана паша деч вара черкыш пурен. Кас службышто калык шагал лийын. Черке покшелне самырык пөръен молитвам йўкын лудын. Светлана, налме сортажым кидешыже кормыжтен, колонно пелен верангын, пөръенгым колышташ тўналын. Чыла мутшым умылен огыл гынат, чонжылан моткоч ласкан чучын.

Молитва мучашлалтмеке, мужанчын кўштымыжым шукташ тарванен. Колышым уштымо ўстел воктек лишемме кыже, тудым тўткын эскерымым шижын. Светлана вуйжым **Умбаке - 10-шо лаштыкыште.**

кайыше ен-влак черкыште кумалшаш лўм-влакым возыман кагаз-шамычым почталыон гоч колтат. Тудыжын сумкашкыже серыш-влак огытат пуро, тунар шуко. Мый вара тиде омым крестный ход жапыште Угарман гыч толшо священник деч йодым. Тудо вес тўняш кайыше ен-влак памашым святитлымылан куаненыт, нунын верч кумалаш йодыт, манын умылтарыш. Вет ожныжо ты памашеш языкым касарыде, Святой Пырчесым подылде, колышо еным мушкыныт манын, шонгыен-влак ойленыт ыле. Мемнан коча-кована-влак тынеш пурышо лийыныт, а ме кызыт нунын верч огына кумал. Конешне, омылан ўшанаш огеш кўл маныт да, но тыште чынже уло манын шонем.

– Черкыштыда Юмын литургий кугарня еда лиеда. А моло кечынже мом ыштеда?

– Ен-влак толыт гын, эр молитвам, акафистым лудына, тиде кечын могай святойым шарналтыман, тудлан тропарьым, кондакым, молитвам лудына. Оптинысе старец-влакын молитваштым пеш йөратена. Шке ласка лият гын, шўм-чонет тыныс лиеш гын, кече мучко лекше йодышым Юмылан йөрышын чын шукташ тўналат. Чылажланат Юмылан тау! Александр Милютин ачана, мемнан благочинныйна Вячеслав Михайлов ачана таза лийышт. Эркын-эркын да садак ончыко каена.

Арам огыл Валентина Аркадьевна кугу пайрем деч ончыч, 11 июлышто, шочын. Господь Иисус Христос тудлан Петр ден Павел апостол-влакын пашаштым кучыктен пуаш палемден улмаш. Апостол-влак Господь Иисус Христосын тунуктен кодымыжым калык коклаш шарен коштымшт годым мыняр шуко нелым, йөсым, мыскылымашым, индыралтамашым чытеныт. Кызытат тыгак, нимо вашталтме гай огеш чуч. Святой Черкын кўштымыж почеш илыше енлан, Юмын корно дене кайыше айдемылан, шуко нелылыкым сенашыже верештеш. Валентина Аркадьевна черкеш икана эсогыл тўкылен коденыт. А тудо тыге веле ойлыш: «Иисус Христос чытен, мыланнат чыташ кўштен».

А мый Давид кугыжан 26-шо псаломжо гыч поро мутым каласынем, тудо ты ўнышө (смирная) марий ўдырамашлан лач келшен толеш: «Юмо мыйын волгалтарышем да Утарышем: кө деч лўдам? Юмо илышемем аралыше: кө деч лўдам?» (Пс. 26:1-2).

Алевтина ТАНЫГИНА.



нөлталын, өрмыж дене эсогыл чытырналт каен: үмбакаже колоннеш сүретлыме святой ончен. «Ой Юмыжат, тудо вет сүрет гына. Кузе тыге ончен кертеш?» – шоналтен Светлана. Тудым ужаш огыл манын, үстел вес могырыш шогалын, но витарен ончымым ынде тупшо дене шижын. Светлана савырнен да ончалтышыже дене святойын шинчаж дене вашлийын. Святой ик кидешыже саркуралым, весешыже храмым кучен. А шинчаже пуйто ойлен: «Тыге ит ыште, уке гын үмырет мучко өкынаш тўналат». Светлана тудым умылен, сортаже-влакым вес иконо ончылан шогалтен да черке гыч шортын лектын куржын.

Кок кече гыч ўдырамаш почто яшлыкыштыже кагазеш пўтыралме пеле йўлышө куд сортам муын. Кагазеш «Сортам шогалте!» манын возымо лийын. Лўдмыж дене кагазым тыгыдын кушкедын, сорта-влакым шўкшак атыш кудалтен. Вес кечын тиде чумырка пачер омса ончылныжо киен, адакше Светлана тушак пўтыралмө шкенжын ўпшым пален. Чумыркам торашкырак чумалын, пачерышкыже писын пурен, уло йўкын шортын колтен. Лыпланемеке, йолташ ўдыржө деке йынгыртен. Таня кужун вучыктен огыл, толынат шуын.

– Тый шем магий дене пайдаланыше деке логалынат. Кўлеш ыле ош магийым палыше деке каяш, – иктешлен Таня.

– Шеме, ошо, – нюслен Светлана. – Ойыртемже могай?

– Аныра улат мо? Шеме – тиде осал, ошо – сай, – умылтараш төчен йолташ ўдыржө. – Тылат ош виян мужанче деке кайыман, Клара туге гына сенен кертат.

Вара пашаштыже ик ўдырамашын тыгай кувам палымыж нерген ойлен. Тудеке коктын каяш лийыныт. Палемдыме кечын йошкар кермычан пөрт деке миен, капкашке тўкалтеныт. Нуным пөръен вашлийын, кө деч толмыштым пален налмек гына пөртыш пуртен. Устел коклаште илалшырак ўдырамаш шинчен, ош үстел шартыш ўмбалам картым шарен оптен. Вара ўмбакашты шыргыжал ончалын:

– Картым кышкен ончышым. Ужам: кок даме толеш, иктыже – червовый, весыже – трефовый. Червовыйжын – шўм-чон паша, весыже тудлан пеш полшынеже.

– Чын ойледа, – чолган пелештен Таня. – Йолташемлан полшаш кўлеш.

– Полшем, полшем. Икымше толмылан 500 тенгем налам, вара 250 дене шотлена. Яра ончен ом керт, илыш пеш шерге, эше налогым тўлыман.

– Налогшым көлан тўледа, – палынеже Таня. – Кугыжанышлан мо?

– Кугыжаныш деч посна налог погышо улыт. Йөра, айста ончалына. Паша сайжак огыл. Тыйым пиковый даме поктылеш, нелым ыштен кертеш. Ыштен огыл гын эше? Кузе шонет, кө тиде?

– Моторлык салонысо ўдырамашет огыл, Светик? Лўмжө – Клара, – коклаш пурен Таня.

– Те Клара Негодинам паледа?

– Мый тудеке миенам, кўштымыжым тичмашнек шуктен омыл, ынде тудо мыйым поктылеш, сандене тендан деке толынна, – куван полышыжлан ўшанен ойлаш төчен



Светлана.

– Молан тидын нерген вигак ышда шижтаре. Клара – маг да экстрасенс-влакын кугуракыштын лишыл енге. Сандене, ўдыр-влак, эн ончыч Клара дене пашадам мучашлыза. Кызытеш нимо денат полшен ом керт. Мый Клара корнешыже ынем логал.

Уремыш лекмек, Светлана шортын колтен:

– Тетла тыге лўдын илен ом керт, милицийыш шижтарем.

– Чын, Светик. Нине колдун кашаклан ушым пурташ кўлеш. Калыкым ондален, оксам кўрын ынышт кий!

Но милицийыш мийымыж дене Светлана йонгылыш лийын. Тудым орадыш кайышылан шотлен, эмлымверыш петыренит. Мыняр кече тушто лийын – Светлана ок шинче. Мөнгө пөртылмек, Таня деч пален налын: тудым паша гычат луктын колтеныт...

Светлана воштончыш ончылан шогалын. Умбакаже шонгемше чуриян, ойго дене варныше ўдырамаш ончен. Тиде ўдырамашлан нимо кўлын огыл, илымат шуын огыл. Светлана ванныйыш ошкылын, эн ончыч душ йымалне мушкылтын: «Колаш гын, яндар могыран колаш». Вара ванныйыш шокшо вўдым темен, пурен возын, воктеланже лезвийым пыштен. Шокшо вўдыштө капкыл лушкен, Светлана шинчажымте кумалтен. Трук тудым вачыж гыч ала-кө тўкалтыме гай чучын, да Светлана пуйто черкысе святойым ужын. Тудыжо порын шыргыж пелештен:

– Кынел, ўдырем, шокшо вўдыштө шуко кияш ок йөрө. Таче мый декем унала мий, шукертсек тыйым вучем.

Светлана шинчажым почын – пеленыже нигө уке. Тудо чулымын ванный гыч лектын, ўштылалтын, писын вургемжым киен да уремыш лектын куржын. А уремыште йырваш ош лум киен. Кече волгыдо дене кажне пырчыже алмаз чинче гай койын. Светлана лумым кидышкыже налын, шўргыжым ниялтен. Тыге ыштымекеже, пуйто шинча ончычшо пўрдышым налын кудалтеныт. Светланалан тугай куштылго лийын, ты жапыште чан йўк веселан йонгалтын. Самырык ўдырамаш йўк шоктымо вельш тарванен:

– О Юмыжат, могай ласка! Илыме веле шуэш! Чу, а могай таче пайрем? 19 декабрь? Очыни, мыйын у шочмо кечем!

Протоиерей Николай АГАФОНОВ.

Н О Я Б Р Ь . Ч Е Р К Е П А Й Р Е М

ПН	4	11	18	25	
ВТ	5	12	19	26	
СР	6	13	20	27	
ЧТ	7	14	21	28	
ПТ	1	8	15	22	29
СБ	2	9	16	23	30
ВС	3	10	17	24	

7	праздник двенадцатые	8	дни строго поста
14	праздник великие	☞	трапеза без мяса
8	сплошные седмицы	🐟	разрешение на рыбу
10	дни поминовения усопших	🌿	разреш. на раст. масло
14	дни постные	🍷	разрешение на вино
		🐟	разрешение на икру рыбы

1 – Пророк Иоилын, святой орланыше Уарын да преподобный Иоанн Рыльский кечышт.
2 – Димитриевский поминка.
4 – Юмын Аван Казанский иконыжын кечыже.

6 – Юмын Аван «Чыла ойган-влакын Куанышт» иконыжын кечыже.

8 – Чот орланыше святой Димитрий Солунский кечыже.

10 – Почаевысе преподобный Иов ден Ростовысе святитель Димитрий кечышт.

18 – Новгородысе Иона да Москва ден уло Российын патриархше Тихон святитель-влакын кечышт.

19 – Преподобный Варлаам Хутынский кечыже.

21 – Архистратиг Михаил ден Пылпомышысо капдыме Куат-влакын погынышт. Шернур селасе, Курыкмари районисо Новая Слобода селасе да

ракетный дивизийысе храм-влакын пайремышт.

22 – Эгинысе святитель Нектарийын да Юмын Аван «Вашке Колыштшо» (Скоропослушник)

иконыжын кечышт.

26 – Святитель Иоанн Златоустын кечыже.

27 – Апостол Филиппын кечыже.

28 – Преподобный Паисий Величковский кечыже.

Иисус Христосын Шочмыж лүмеш пүтө тўналтыш.

29 – Апостол да евангелист Матфейын кечыже.

30 – Преподобный Никон Радонежский кечыже.

ПЕРКАН ЛИЙЖЕ

КЕЧЕ ГАЯК

Кешырым кече дене танастараш лиш. Кешырат кече гаяк чевер, вий-куатым пуышо, кумылым нўлтыш. Ты пакчаскаште улшо эн шерге микроэлемент – бета-каротин. Капкылыш логалмеке, тудо А витаминеш савырна, пўйым, шинчан сетчаткыжым пенгыдемда. Кешыр тыгак В, С, Е, К, РР витамин-влаклан поян, тўрлў микроэлемент шуко. Лач нуно айдемын капкылыштыже инфекцийым пытарат, сандене кечылан кеч ик кешырым кочман. Кўктымў кешырынат, свежанат пайдаже икнарак.

КУШТЫЛГО САЛАТ

Кўлыт: 2 кешыр, 100 г сыр, 2 пўй чеснок, 1 кугу совла майонез, тамже дене шинчал.

Кешырым, сырым шолдыра, а чесноком чот тыгыде пўян тёркеш нўжыза. Майонезым, шинчалым пыштыза да варыза.

Тыгай салатым киндешат йыген кочкаш лиш.

КЕШЫР КЕКС

Кўлыт: 3 кугу кешыр, 3 кўчымў муно, 1 стакан сакрыложаш, 1 стакан ош ложаш, 0,5 изи совла содо, 1 кугу совла нўшмўй, 1 чывыштыш шинчал.

Нўшмўйым, муным, сакрыложашым пырля лугыза. Вара содым, шинчалым, ложашым пыштыза, угыч лугыза. Тушкак тыгыде пўян гёркеш нўжымў кешырым ешарыза да сайын варыза. Нўшмўй дене йыгыме формыш опталза, 180 градус марте ырыктен ямдылыме духовкеш шынден, 1 шагат кўктыза.

КОТЛЕТ

Кўлыт: 3 кугу кешыр, 3-4 кугу совла маный шўраш, 2 кўчымў муно, 1 кугу совла сакрыложаш, 1 чывыштыш шинчал, 1 кугу совла нўшмўй, сукара гыч ыштыме ложаш.

Кешырым тыгыде пўян тёркеш нўжыза, тушко шинчалым, сакрыложашым, муным, маный шўрашым ешарыза да сайын варыза. Котлет-влакым ыштен опыза, сукара ложашеш пўрдалтарен, ырыктен ямдылыме нўшмўян салмаш пыштыза. Кок могырге 3-5 минут дене жаритлыза.

Котлет вес тўрлў таман лийже манын, шолдыра пўян тёркеш нўжымў кешырым кастрюльыш пыштен, пел стакан шўр дене пырля 30 минут изи тулышто шинчыктыза. Тушко 20 г маргариным ешарыза. Йўкшымекеже, муно, шинчал, сакры дене пырля 120 г йоктарыме торыкым пышташ лиш. Маный шўраш да сукара ложаш олмеш ош ложашым кучылт кертыда.

Кешыр котлетым ўмбал дене кочса.



КОЧКЫШДА ПЕРКАН ЛИЙЖЕ!

Куанен чиялтена



ШЫЖЕ

*Пеш шуко тус дене
чиялгыш ялна,
Воктене вондер шортнын
койын шога.
Пүртүс моторештын,
сылнешт чеверген.
Тыгае вургемым поян
Шыже чиктен.*

*Ончалза, моторлык
йолважим шарен,
Йоратымаш дене тунянам
түрлен.*

*Куанен пүртүслан,
кундемнаже ила –
Йоратыше Юмо мемнан
дене пырля.*

*«Пырче» рушарня школын
тунемшыже-влак.
Морко район, Арын села.*

Изи ўдырын кидыштыже кок олма лийын. Шыргыжалын, аваже туддеч ласкан йодын: «Чукаем, ала ик олмажым мыланем пуэт?» Ўдыр икмыняр жап аваж ўмбак туткын ончен да вучыдымын ончыч ик олмам, а вара весыжым писын пурлын. Йоратыме изи падырашыже тудлан олмажым пуаш чаманен шонен, ўдырамашын кумылжо чот волен. Тидым палдараш огыл манын, шўлыканныжым кузе-гынат шылташ тыршен. Ўдыржў трук ик олмажым тудлан шуялтен да каласен: «Авай, тебе тиде олмам нал, тудо весыж деч тамлырак!»

Шкендым ушанлан шотлышо да илышым палыше кугуен улат гынат, вес ен нерген удам шонаш ит вашке. Умбакыже мо лийшашым изиш вучалте, мо лиймым рашемдаш жапым ит чамане. Вет мом ужмыланна, шке семын шонен луктын, уда акым пуымына шукуж годым йонгылыш лийын кертеш. Вес айдеме тыгодым мом шонен, ме огына пале.

Туныктен каласыме шомак



«ШЎМ-ЧОН ИЗОЛЫК» МАРИЙ ПРАВОСЛАВНЫЙ ЖУРНАЛ
Учредитель: "Руш Православный Черкын Йошкар-Оласе да Марий Элысе епархийже (Московский Патриархат)" религиозный организаций.

Журнал зарегистрирован Управлением Федеральной службы по надзору в сфере связи, информационных технологий и массовых коммуникаций по Республике Марий Эл, свидетельство о регистрации ПИ № ТУ 12-0164 от 12 декабря 2013 года.

Тираж: 1500 экз. Формат - А-4-12. Журнал лекме жап - 1.11.2019 ий.
0+ - знак информационной продукции согласно ФЗ от 29.12.2010 г. №436-ФЗ.

Журналым редакцийште погымо да верстатлыме, «Принтекс» ООО-што ямде оригинал-макет гыч савыктыме. Адресше: 424000, Марий Эл, Йошкар-Ола, Карл Либкнехт урем, 71 "А" пöрт.

Редакцийын да издательын адресше: 424000, Йошкар-Ола, Вознесенский урем, 81, 224 пöлем.
Тел.: (88362) 45-39-54.

E-mail: marlagazet@mail.ru

Түн редактор: Н.В. Чузаев.

Редакционный совет: И.А. Сапаев, Д.В. Смирнов, А.П. Чемякова, А.В. Эманова.

Компьютер дене келыштарыше: Д.В. Смирнов.
Ак - кутырен келшыме почеш. Авторын да редакцийын шонымашышт түрлö лийын кертят. Серыш-влак мөнгеш огыт колталт.

РЕДАКЦИЙ ЙОДЕШ: ЖУРНАЛЫМ ШАЛА КЫШКЫЛ-ТАШ ОGYЛ. ЛУДЫНАТ - ВЕСЫЛАН ПУ!